


菩薩善戒經

第二

二百四
賢二

48798



菩薩善戒經卷第二

賢

宋劉賓三藏法師求那跋摩等譯

菩薩地真實義品第五

云何名真實義真實義有二種一者法性二者法
者法等復有四種一者世流布二者方便流
布三者淨煩惱障四者淨智慧障云何名世
流布世間之法同其名号衆生見地真實是
地終不言火火真實火不言是地水風色聲
香味觸衣服飲食瓔珞器物伎樂明闇男女
舍宅田業苦樂苦真實苦終不言樂樂真實
樂終不言苦此是此非定以不定一切世間
從昔已來傳此名相自然而知不從修集然

後知也是名世流布真實義也云何名方便
流布如世智人先以籌量然後造作經書論
議是名方便流布云何淨煩惱障一切聲聞
辟支佛等以無漏智無漏道壞煩惱故得無
礙智是名淨煩惱障以壞煩惱故智得明淨
智慧淨故身心無礙是名淨智慧障真實義
也云何復名真實真實者名為四諦所謂苦
集滅道觀此四諦得實智慧是名聲聞辟支
佛聲聞辟支佛分觀五陰是故離陰都不見
我及以我所分觀十二因緣是故離陰不見
衆生及以士夫是名淨智慧障真實義也若
智不能知境界者名曰智障若能壞障知境

界者名淨智障真實義也真實義者謂佛菩薩深觀一切陰入界故觀我無我衆生非衆生士夫非士夫是名淨智障觀諸法界不可宣說知世諦故分別法衆知諸法界真實性故名無勝慧無勝慧者壞一切障是故名爲淨智慧障真實義也真實義者有二種一者

有二者無有者名世流布世流布者所謂色受想行識眼耳鼻舌身地水火風色聲香味觸善不善無記出法滅法從緣生法去來現在有爲無爲此世他世日月見聞識知所得覺觀修集受持乃至涅槃是名世流布有也世間有者所謂法性無者世流布有從色乃

至涅槃其性無故是名爲無衆生見故名之
爲有法性本無名之爲無諸佛如來所說有
無名之真實真實者名爲中道非有非無名
爲中道中道者名無上道如是中道諸佛世
尊除壞障礙是故名之爲一切智菩薩摩訶
薩雖覺如是中道猶有障礙是故不得爲一
切智菩薩智慧爲方便故名阿耨多羅三藐
三菩提因何以故菩薩摩訶薩雖不具足中
道智慧說生死相亦有亦無亦爲流布無上
佛法雖在生死亦能了了知生死過患心無
厭悔如其不知生死過者則不能得壞煩惱
結若心厭者則不能得教化衆生護諸佛法

疾得涅槃若得涅槃則不能得阿耨多羅三藐三菩提若不教化諸衆生者云何能得阿耨多羅三藐三菩提菩薩若在生死之中修菩提道不畏涅槃不求涅槃菩薩若畏於涅槃者則不能得具足莊嚴菩提之道亦不能爲無量衆生讚嘆涅槃於涅槃所不生信喜專念之心是故菩薩於涅槃所不生怖畏若是菩薩求涅槃者即能得之如其得者則不能成阿耨多羅三藐三菩提以諸佛法教化衆生若是菩薩不能深觀生死過患或生厭離怖畏涅槃或求涅槃是名菩薩無善方便若是菩薩能深觀察生死過患樂處其中不

畏涅槃不求涅槃是名菩薩有善方便善方便者解第一義空菩薩摩訶薩修集如是第一義空名菩薩戒大方便也為得如來無上智故若有修集是菩薩戒得真實智知見諸法無我我所知諸法性是故於法心無所著亦說世諦第一義諦見一切法其心平等能大惠施以施因緣善知世事雖學世事心不厭悔悉得了知得大念力雖知世事心無憍慢常教衆生不生慳恡以巧方便善教衆生世間之事為令衆生得阿耨多羅三藐三菩提故菩薩於是世間之事勤心修集無有厭悔若見衆生受苦惱時即得增長阿耨多羅

三藐三菩提心菩薩如是增長善法不生憍
慢於諸衆生生憐愛心菩薩如是增長智慧
不生憍慢破壞衆生種種邪見菩薩若得世
間三昧出世三昧不顯己德今他供養不爲
世法之所汙染菩薩今時成就具足無量功
德名菩薩戒菩薩摩訶薩所有善法悉以迴
向菩提之道名菩薩戒過去菩薩得阿耨多
羅三藐三菩提皆由成就菩薩禁戒未來現
在亦復如是菩薩摩訶薩受持三世諸菩薩
法能以佛法教化衆生至心修行菩提之道
爲菩提道不惜身命不惜身命是菩薩戒惜
身命者終不能得菩薩禁戒乃至恡惜一錢

之物亦不能得菩薩禁戒菩薩摩訶薩爲衆
生故受身畜財若於是二生恡惜心假名菩
薩非義菩薩菩薩若能不惜財命當知則能
利益衆生能行忍辱能壞瞋恚嫉妬之心了
知世事善解方便能壞衆生所有疑心能自
增長菩提果因善能調伏所有諸根不爲四

明

善升經二

倒之所傾動能解諸法甚深之義能得具足
四無量心成就五通四無礙智畢竟能觀十
二因緣逮得菩薩一子之地能得常樂我淨
之身得大自在無上涅槃善能開示方便涅
槃菩薩摩訶薩成就如是無量功德皆因禁
戒因緣而得菩薩摩訶薩成就具足菩薩戒

者能爲一切衆生僕使若爲衆生之所瞋罵
打害劫奪則生慈心若見衆生厚重煩惱發
憐愍心爲欲破壞衆生煩惱繫心思惟諸善
方便於諸衆生心無姦曲任力所能施衆生
樂不求恩報不懷瞋恨爲壞衆生瞋惱心故
思惟方便知恩念恩無有求者先意行施若
已所有不施求者不得成就菩薩禁戒求者
三至若不施者是名犯重不犯者若以方便
善語慰喻令彼求者不生根心求者二種一
者貧窮二者邪見不施貧者則便得罪不施
邪見則不名犯若不犯者是名善行善行善
薩諦知法界不可宣說知法界性知世流布

世流布者色受想行識乃至涅槃色乃至涅槃不名真實何以故而是色者非有非無乃至涅槃非有非無若非有無云何真實云何非有衆生顛倒計色爲我乃至涅槃橫計爲我是名非有云何非無世流布故不虛誑故可宣說故是名非無以是故名非有非無如所說法如說有者一法之中應無量名無量名故則有無量性何以故一一法中有無量名故云何名爲無量名耶如色一法亦說青黃赤白長短方圓麤細可見不可見有對無對澀滑輕重是名可說隨說有者應一法中有無量相所可宣說實無定性以言說故流

布於世實無說者及真實性一切諸法亦復如是如其色中乃至涅槃有實性者不應說有青黃赤白乃至輕重若無實性未流布時去何可傳以流布性有無有初始故可流布若未有色時有流布者以何因緣無色之時不流布耶如其流布能作色性者何故流布而不能作色無量性是故法性不可宣說如色受想行識乃至涅槃亦復如是有二種人遠離佛法非佛弟子永失佛法一者說色乃至涅槃有真實性二者不信世流布性如是二人不任受持菩薩禁戒如其受者受者不得師則有罪何故不得誹謗實法者非法故是

故雖受終不得戒若不得戒云何得名在此
法中為佛弟子是故名為遠離佛法菩薩戒
者非口所得心口和合然後乃獲是二種人
都無實心云何可得若於色中妄生計著於
佛法中則為永失若不信色是流布者是則
名為謗一切法是人則為永失佛法是故不
可宣說若有若無何以故如因五陰則有我
人衆生士夫若無五陰如是等名何由流布
色亦如是以有色故則有種種名字流布真
實之法無有流布離真實法亦無流布愚癡
之人說諸法空則得大罪若有說言大乘經
中一切法空亦得大罪不能善解大乘經義

生憍慢心言我善解隨其自心妄想思惟爲
人廣說亦得大罪若言一切諸法性無云何
得有流布於世亦得大罪何以故謗一切法
故謗一切法者即是外道富蘭那等真弟子
也富蘭那謂法性無而佛法中亦有亦無若
有人說一切法空當知是人不中共住共語

論議布薩說戒若與共住乃至說戒則得大
罪何以故不解空義故是人不能自利利他
是故大乘經說若不解空甚於癡人何以故
愚癡之人說色是我至識是我有我見者不
壞佛法不解空義永壞佛法破失滅沒生我
見者不至三惡不解空義爲人廣說當知是

人必到阿鼻有我見者不謗三寶妄說空者
誹謗三寶說有我者不誑衆生不謗實性不
妨法性不妨衆生獲得解脫不教他人毀犯
禁戒不解空者謗一切法不解實性不解法
性妨於解脫與多衆生作惡知識自不持戒
教人毀禁常樂宣說無作無受令多衆生增
長地獄以是義故名爲遠離無上佛法云何
名爲不解空義若有比丘比丘尼優婆塞優
婆夷不信受空不解於空不解於法是則名
爲不解空義何以故說一切法本性自空無
因緣空說一切法亦無處所若無處所云何
名空是名不解空云何名爲真解空義若比

丘比丘比丘優婆塞優婆夷說一切法中無有
性故是名為空法亦不空是名解空如是解
者不妨於義不謗三寶是名正解無有錯謬
云何正解如色說色乃至涅槃分別無有種
種相性是名色空以色真實流布於世是名
不空以是義故說色一法亦有亦無解是二
故亦法亦空終不於中妄生計著是名真解
空義是故大乘經中說偈

一法有多名 實法中則無
一法性故

流布於世間

如色乃至涅槃則有多名色無自性無自性
者則無多名有多名者名為流布以是義故

雜藏中說諸佛世尊不著流布若見若聞思
惟覺知如色名乃至涅槃名名為流布諸佛
世尊終不說言有流布性而生染著何以故
壞顛倒故有染著者名為顛倒如來已斷一
切惡見故不染著以不見不說不染著故名
為正見是故如來為迦旃延比丘而作是說
迦旃延我弟子者不著地定水火風定空定
識定無所有定非有想非無想定非此世非
他世非日非月非見非聞非思非量非取非
得非覺非觀是名禪定云何比丘不著地定
比丘於地不作地相乃至覺觀不作覺觀相
是則名為不著地定乃至覺觀亦復如是若

有比丘能作如是修集定者即爲諸天釋天
梵天十方諸佛及大菩薩之所讚嘆南無大士
南無大士咸作是言我都不知汝在何定修集
何定若有染著地相地名當知是人名不修
空若於色中不著名相是名修空爲流布故
宣說地相及以地名若著色相及以色名名
增長相若壞色相及以色名名放捨相不增
不捨是名中道修集如是二種相故是名比
丘修集地定乃至覺觀若有比丘修是定者
是名實相以實相故比丘於法無所言說以
諸法性不可說故是故比丘無所言說若一
切法無可說者去何說不可說若不可說云

何得聞若不說不聞去何得知一切諸法不可宣說以可知故說今流布愚癡之人不知不解世流布故於諸法中生八種謬一者性謬二者分別謬三者聚謬四者我謬五者我所謬六者愛謬七者不愛謬八者非愛非不愛謬是八謬中初三種謬乃是一切者謬根本者性著名不解流布從此展轉生無量謬我我所謬名爲我是我見復是諸見根本是二種謬從憍慢生見故憍慢諸見根本後三謬者從三毒生是八種謬攝取一切諸結煩惱今諸衆生迴轉三有云何性謬若色作色想乃至重作重相是名性謬云何分別謬若

分別色是色非色是可見是不可見是有對
是無對是名分別謬云何聚謬如於色中見
我衆生士夫壽命屋舍四衆軍旅衣食蓮花
車乘樹木積聚如是等中各作一相是名聚
謬云何名我我所謬於有漏中取我我所無
量世中常生取著計我我所是名我我所謬
云何愛謬於淨物中生貪著心是名愛謬云
何不愛謬於不淨物中生瞋恚心是名不愛
謬云何非愛非不愛謬於一切淨不淨物中
生貪恚心是名非愛非不愛謬是名八謬菩
薩摩訶薩云何能知是八種謬應推四事何
等四一者推名二者推物三者推性四者推

分別云何推名菩薩摩訶薩唯知名名不見
名物是名推名云何推物唯知是物不知餘
者是名推物云何推性知名流布是名推性
云何推分別名不見物物不見名是名推分
別菩薩摩訶薩何故推名知名實名是故推
名菩薩諦觀若無色名何由說色若不說名
云何觀色若不觀色云何而得阿耨多羅三
藐三菩提是故菩薩推求知名菩薩何故推
求於物若無物者推有此名而此名者非不
可說若不可說云何得知諸法之性是故菩薩
推求於物菩薩何故推求於性菩薩摩訶薩
知於色性乃至涅槃性知色流布乃至涅槃

流布去。何名爲知於色性。知是色性。如鏡中
像。幻化夢影。響熱時之焰。水中月形。是名推
性。菩薩何故推求分別。菩薩摩訶薩。若分別
名分別物。分別性分別法。分別非法。分別有
無。是色非色。可見不可見。是名分別。以分別
故。得阿耨多羅三藐三菩提。是故菩薩推求
分別。菩薩摩訶薩。爲壞八謬。推是四事。菩薩
何故壞是八謬。八謬。因緣增長。邪見。邪見增
故。煩惱增長。煩惱增長。故生死增長。生死增
長。故十二因緣增長。菩薩若修如是四事。斷
除邪見。邪見斷。故諸煩惱滅。煩惱滅。故生死
滅。生死滅。故知十二因緣滅。知十二因緣滅。

故修無上道修無上道故得阿耨多羅三藐
三菩提得阿耨多羅三藐三菩提故能壞衆
生如是八謬能教衆生知世流布說真實義
若除衆生如是八謬名大涅槃能得現世大
自在故得大神通故得大方便故得大禪定
故得大一切知故求得不退不墮處故是名
大涅槃得大自在菩薩摩訶薩成就五事一
者心得寂靜二者了知世事及出世事三者
爲衆生故處在生死心不愁惱四者了知如
來甚深秘藏五者菩提之心無能壞者菩薩
何故心得寂靜能破現在衆生煩惱故心得
寂靜爲調衆生得佛法故了知世事及出世

事為令衆生得利根故樂處生死心不愁惱
為令衆生破壞疑心受持讀誦了知如來甚
深秘義法說非法能滅佛法汙辱佛法犯說
非犯受畜八種不淨之物為償如是諸惡人
故受持解說如來秘密甚深之義雖知外道
微細書論解其義趣終不破壞菩提之心如

是五事攝取菩薩菩提之事亦名五事亦名
五功德何等名為菩提之事能自利根調伏
衆生受持佛法不破菩薩所修禁戒菩提之
心終不傾動勤修精進壞邪見等說三乘道
菩薩成就如是五事有三種謂下中上具足
二種是名為下具足三種是名為中若具四

種是名爲上

菩薩地不可思議品第六

云何菩薩摩訶薩不可思議菩薩摩訶薩得自在三昧發心已得無量功德不造作業而獲果報不修聖道而得聖心是名菩薩不可思議少作善業得大果報爲菩提故於無量世修諸苦行菩薩實知無有衆生而能爲之勤修苦行知無作者及無受者能作受者是名菩薩不可思議不可思議有五種一者六通不可思議二者法不可思議三者性不可思議四者共生不可思議五者不共生不可思議云何六通神足天耳天眼他心智宿命

智漏盡智是名六通不可思議云何法不可
思議法者所謂檀波羅蜜尸波羅蜜羸提波
羅蜜毗梨耶波羅蜜禪波羅蜜般若波羅蜜
是名法不可思議云何神通神通有二種一
者變二者化何等爲變振動出火光明示現
自轉其身或現去來現種種色大衆隱顯障
他神通言辭無礙施他憶念施衆歡樂放大
光明是名變神通云何震動菩薩摩訶薩得
自在三昧能動舍宅聚落村邑城郭國土從
四天下至千世界二千世界三千大千世界
百三千大千世界千三千大千世界千萬三
千大千世界乃至無量無邊世界是名震動

云何出火身上出火身下出水身上出水身
下出火或舉身出火作種種色青黃赤白紫
黑頗黎是名出火云何光明身出光明充遍
一舍聚落村邑乃至無量無邊三千大千世
界是名光明云何示現諸佛菩薩為度衆生
示現地獄畜生餓鬼天人雜類軋閻婆阿修
羅迦樓羅緊那羅摩睺羅伽或復示現十方
世界無量無邊恒河沙等諸佛國土及其佛
身諸大菩薩說諸佛名令諸衆生皆悉聞知
是名示現云何為轉諸佛菩薩得自在三昧
能變地為火變火為水風亦如是變色為香
變香為色色香味觸變為草木衣食瓔珞器

物石具琉璃真珠金銀等山好色作惡惡色
作好是名爲轉云何去來或任梵處從梵處
還或任阿迦膩吒天上復從彼還或至東
方南西北方四維上下乃至無量無邊世界
皆亦如是遠能作近近能作遠能令須彌如
小微塵令小微塵如須彌山是名去來云何
種種色能現自身或作男女大小僮僕樹林
草木是名種種色云何大衆隱顯自在能以
大衆內已身中而心不怖身無妨礙是諸大
衆各不自知來往處所或時往至娑羅門衆
現同其像同色同衣形質脩短與彼無差音
聲無別彼邪說者亦能說之彼不能說亦能

說之能以方便善導其人示已即滅彼衆不知何來何滅人耶天耶如婆羅門衆刹利衆大會衆長者衆四天王衆三十三天衆夜摩天衆兜率陀天衆化自在天衆他化自在天衆梵衆梵師天衆大梵天衆少光天衆無量光天衆淨光天衆少善天衆大善天衆無邊善天衆無雲天衆福生天衆廣果天衆無需天衆無誑天衆善見天衆愛見天衆阿迦臆吒天衆亦復如是於如是等諸天衆中一時之頃百出百没千出千没千萬出千萬没是名大衆隱顯自在去何障他神通菩薩摩訶薩除佛世尊同行同性同定後邊生菩薩所

得神通勝餘內外一切神通是名障他神通
云何言辭無礙菩薩摩訶薩說法之時言辭
無盡義味無盡樂說無盡是名言辭無礙云
何施他憶念菩薩摩訶薩說法之時無量衆
生於無量世諸所失念悉令還憶是名施他
憶念云何施他歡樂菩薩摩訶薩說法之時
能令衆生身心安樂壞煩惱障聽者歡樂如
第三禪四大諸患一時消滅諸惡鬼等不得
其便是名施衆歡樂云何放大光明菩薩摩
訶薩放大光明遍照十方無量世界至地獄
中壞地獄苦至放逸天教修人法令得人身
來至佛所請召十方無量菩薩來集佛所教

化衆生是名放大光明如是等事名變神通
轉法性故名變神通云何化神通物無作物
故名爲化若化身若化聲化身者或似己身
或似他身有根具足不具足者餘如轉中又
復化爲無量之身諸佛菩薩爲衆生故化無
量身遍無量界有佛菩薩現遍化身或有如
幻或有真實衣食金銀琉璃真珠頗梨珂貝
亦復如是爲破衆生貧窮困苦是名化身化
聲者諸佛菩薩化現好聲疾聲妙聲自說義
聲他說義聲無義聲說法聲教化聲以是諸
聲能壞衆生放逸之心是名化聲佛菩薩聲
深遠如雷如迦陵頻伽聲人所愛樂聲遍滿

聲思惟聲了了聲易解聲喜聞聲無所著聲
無可呵聲無盡聲菩薩摩訶薩如是諸聲若
三千大千世界所有天衆人衆聲聞衆辟支
佛衆菩薩衆若近若遠悉得聞之如是聲中
出種種法利益衆生自化聲者如自說法爲
放逸衆生故他化聲者如佛化身爲他說法
爲放逸衆生故無義聲者如虛空出聲說法
聲者爲癡衆生故教化聲者爲放逸者增長
不放逸故諸佛菩薩如是等化神通之事展
轉無量不可稱計如是無量不可稱計神通
變化爲於二事一者爲令衆生生於信心趣
向佛法故二者爲示貧窮困苦衆生無上福

田故云何宿命智菩薩摩訶薩自知宿世與
如是等衆生共住共行自識名字及他名字
知自種姓及他種姓知自飲食及他飲食自
知苦樂及他苦樂菩薩自知如是宿世亦能
教他令知宿世自識乃至無量世事亦能教
他識無量世若麤若細是名宿命智以是宿
命智勢力故能說本昔菩薩因緣令諸衆生
於佛法中現在生信說諸菩薩本因緣經闍
陀伽經阿波陀那經說業因緣惡業善業爲
破衆生常見及無常見故是名菩薩宿世智
云何天眼菩薩摩訶薩以淨天眼過於人眼
見諸衆生死此生彼若好色若惡色若好若

醜明見衆生善惡等業善惡果若老若少若
自造作若教他作若麤若細若人天色若三
惡道色乃至無量十方世界無量佛土衆生
之色明了無量十方諸佛演說法時是名天
眼通云何天耳菩薩摩訶薩所聞音聲若天
聲若人聲若聖聲若非聖聲若麤聲若細聲
若化聲若實聲若遠聲若近聲天聲者從欲
天至阿迦尼吒乃至上方無量世界諸天音
聲悉得聞之是名天聲人聲者所謂十方無
量世界聖聲者謂諸佛菩薩聲聞緣覺爲化
衆生宣說佛法若讚布施持戒善業破壞惡
業讀誦解說書寫佛經是名聖聲非聖聲者

所謂妄語兩舌惡口無義之言下。至三惡上。至欲界所有諸天十方衆生有如是等四種。惡口是名非聖聲云。何鹿聲謂大衆聲。大衆生聲。地獄聲。雷震聲。貝聲。鼓聲。是名鹿聲。細聲者謂竊語聲。不了聲。陀毗羅國聲。粟特聲。月支聲。大秦聲。安息聲。真丹聲。佉沙聲。裸形聲。鮮卑聲。如是等邊地聲。名爲細聲。何以故。嫉妬煩惱因緣得故。菩薩成就如是天耳聞諸衆生所出善聲。讚嘆恭敬。教住佛法。今生信心廣爲分別。十二部經。菩薩秘藏。若聞惡聲。即便呵責。說惡業過。開對治門。是名天耳通。云何他心智通。菩薩悉知十方世界所有。

衆生共煩惱心不共煩惱心煩惱繫心及不
繫心善願心惡願心疑心無疑心上心下心
貪恚癡心欲界心色無色界心乃至一切畜
生衆生受苦樂心無苦無樂心以一心觀一
衆生心以一心觀無量衆生心是名他心智
通諸佛菩薩他心智通爲知衆生利鈍根故
爲知衆生諸種性故知是衆生有善心已即
爲演說十二部經及菩薩藏知惡心已即便
呵責說惡業過是名菩薩他心智通漏盡智通
者菩薩摩訶薩爲斷煩惱故修集道自壞煩
惱故修集道爲壞衆生諸煩惱故而爲說法
而壞有漏憍慢衆生爲破非道計道衆生故

菩薩摩訶薩雖爲衆生說盡漏法自不盡漏
雖未盡漏不爲所汙菩薩摩訶薩漏盡智通
不可思議修漏盡通爲化衆生壞憍慢故是
名漏盡通云何爲性檀波羅蜜乃至般若波
羅蜜果是名爲性是六種果凡有四事一者
修集道故二者莊嚴菩提故三者自他利益
故四者得後世大善果故菩薩行施破壞慳
貪莊嚴菩提攝取衆生爲菩提道令行布
施欲施施時施已歡喜是名自利斷除衆生
飢渴苦惱寒熱恐怖是名利他捨是身已獲
大自在饒財尊貴是名大果是名菩薩布施
四事菩薩摩訶薩受持禁戒除滅惡戒莊嚴

善提道攝取衆生爲善提道令持禁戒離破
戒怖卧安覺安心無悔恨歡喜悅樂是名自
利於諸衆生無有害心施衆生無畏是名利
他持戒故受人天樂得道涅槃是名大果是
名菩薩持戒四事菩薩摩訶薩修於忍辱破壞
不忍莊嚴善提道攝取衆生爲善提道令修
忍辱若自若他遠離怖畏是名自利利他以
忍因緣無有瞋心眷屬不壞不受苦惱心無
悔恨捨是身已受人天樂得道涅槃是名大
果是名菩薩忍辱四事菩薩摩訶薩勤修精
進破壞懈怠莊嚴善提道攝取衆生爲善提
道令修精進卧安覺安離諸煩惱增長善法

身受安樂是名自利菩薩精進不惱衆生打
擲呵罵是名利他捨是身已受人天樂身得
大力獲菩提道是名大果是名菩薩精進四
事菩薩修定壞破亂心莊嚴菩提道攝取衆
生為菩提道今修禪定現世受樂身心寂靜
是名自利以身心靜故不惱衆生是名利他

捨是身已受清淨身安隱快樂得道涅槃是
名大果是名菩薩禪定四事菩薩摩訶薩成
就智慧破壞無明莊嚴菩提道以四攝法攝
取衆生為菩提道修行智慧以知法界故身
受安樂是名自利能教衆生世間之事及出
世事是名利他能壞煩惱智慧二障是名大

果是名菩薩智慧四事共生不可思議者善
薩摩訶薩非宿命智憶宿世事爲觀衆生善
惡諸業同受苦者爲欲利益菩薩摩訶薩處
兜率天成就壽命有三事勝一者壽勝二者
色勝三者名稱勝初下之時放大光明遍照
十方了了自知始入母胞胎時住時出時於
十方面行七步時無人扶侍作如是言我今
此身是最後邊諸天鬼神輒圍婆阿修羅迦
樓羅緊那羅摩睺羅伽以諸華香微妙伎樂
幡蓋供養三十二相莊嚴其身無能勝者以
慈善力壞魔兵衆一支節同那羅延所得
大力童齒之年不學世事而能知之無師而

學自然而得阿耨多羅三藐三菩提梵天勸
請爲諸衆生轉正法輪正受三昧雷聲震動
不能令動諸獸親附愛如父母畜生奉食知
佛心故雲神降雨洗浴其身樹隨曲枝蔭翳
其軀旣成道已六年之中魔常伺求不得其
短常在禪定成就念心善能了知覺觀起滅
是名菩薩共生不可思議不共生者爲欲利
益一切衆生如彼狂人緣見如來還得本心
盲者得眼倒產得順聾者得聽貪瞋癡者悉
得除滅是名不共生不可思議又共生者如
來所行不可思議常右脇卧如師子王若草
若葉無有動亂隨藍猛風不動衣服發足行

步如師子王白鷲王等若欲行時先發右足
所行之處高下皆平食無完過遺粒在口是
名共生不可思議如來世尊入涅槃時大地
震動放大光明遍十方界一切悉聞伎樂之
音是名共生不可思議云何名爲共聲聞緣
覺不共聲聞緣覺不共有三一者細二者行
三者界如來悉知一切衆生無量煩惱無量
對治是名爲細行者名爲六通六波羅蜜法
性自生不可思議是名爲行界者一切世間
無礙智慧是名爲界是名不共生不可思議
聲聞神通齊二千世界緣覺神通齊三千大千
世界諸佛菩薩通達無量無邊世界是名不

共共者除上三事餘一切法是名為共是故
 聲聞辟支佛等尚不得與佛菩薩共況凡夫
 人天外道邪見菩薩摩訶薩六波羅蜜法性
 共生不共生聲聞緣覺共法不共法是名不
 可思議

菩薩善戒經卷第二

賢

籌量上直 逮逮二同 劫奪上劫字用 澀澀二

所立膩吒上反 需天上音 珂貝上苦何

帶竊語上音 裸形上反 鮮卑上音 蔭翳下博

伺求上相 右脇下虛 亂反

